

الأنبياء الصغار

ناحوم

الرب بطيء الغضب وعظيم القدرة، ولكنه لا يبرئ البتة

الله على كثرة رحمته و عظمة إيماله، هو قاضي عادل ... لا يُسَرُّ بالشر ... ربنا بيدي فرص كثير للتوبة لكن لو الإنسان كَمَل في عناده و رفضه هيقع عليه العقاب و الدينونة ... و الله في دينونته يرحم خائفيه و الذين يتقون اسمه و ينجيهم في يوم الضيق

! أسفار الأنبياء الصغار ممكن تقول أقل أسفار بنقراها أو بنعدّي عليها من غير ما نفهمها ... رغم إنها مليانة نبؤات مهمة جداً عن ربنا و عن الكنيسة لدرجة إن كنيستنا في أسبوع الآلام (أقدس أسبوع في السنة اللي بيركّز على الصليب) بتقرا كثير جداً من أسفار الأنبياء الصغار

i عن السفر



عن الكاتب:

- معنى الاسم: **تعزية (أو معزّي)** ... السفر بيتكلم عن انتقام ربنا من آشور اللي سبت إسرائيل ... انتقام الرب من الأعداء و تعزية شعبه
- فترة النبوة: **قبل و أثناء السبي (حضر سبي آشور لإسرائيل)**
- أهم إنجازاته: **تبشير الشعب و إعطائه الرجاء بخلاصه و هلاك أعدائه الأشرار و دينونة الله لهم**

عدد الإصحاحات: 3

? ظروف الكتابة:

- في الوقت ده كانت إسرائيل مسبية لمملكة قوية جداً محتلة العالم هي مملكة آشور و عاصمتها نينوى (اللي كانت ثابت بمناداة يونان، لكن للأسف رجعت للشر تاني بعد كده بأجيال بدرجة رهيبة و كسرت مملكة إسرائيل كلها)
- كانت هاتدخل و تحتل مملكة يهوذا كمان لولا المعجزة اللي ربنا عملها (الملاك اللي قتل 185 ألف من جنود آشور) في عهد حزقيا الملك و إشعياء النبي
- مملكة آشور كانت من أصعب و أعنف الممالك في التاريخ و فترة السبي بتاعها لمملكة إسرائيل كانت فترة دموية و صعبة
- ناحوم ببشّر إسرائيل هنا إن مملكة آشور ستسقط ... و ده اللي حصل فعلاً بعد كده، سنة 612 ق.م. عملت مملكة بابل ثورة على آشور و قدرت تحكم هي العالم ... و سقطت آشور

👉 السفر موجّه لمين؟ لمملكة إسرائيل (مملكة الشمال)

✉ **هدف السفر:** نبوة عن سقوط نينوى (عاصمة مملكة آشور التي سبت مملكة إسرائيل و استعبدتهم بعنف) كصورة مستقبلية لدينونة الله للأشرار في اليوم الأخير و قضاء الله بالعدل

🔑 مفتاح فهم السفر:

- نينوى = رمز للشر (عاصمة مملكة آشور الشريرة) ... سواء على المستوى الجماعي أو الفردي
- ملك آشور = الشيطان ... و كل من يمشي في طريقه و يبيع نفسه له

ترتيب السفر

إصحاح #1

الله قاضي عادل غيور

مقدمة عامة عن ربنا كإله قوي غيور منتقم من الشر



إصحاح #2

سقوط نينوى



منظر معركة حربية سقطت فيها نينوى عاصمة آشور التي كان يُظن أنها لا تُقهر

إصحاح #3


سقوط مملكة آشور كلها



سقوط مملكة آشور كلها وملكها (رمز للشيطان)

ملخص السفر

1: الله قاضي عادل غيور



- بدأ ناحوم النبي نبوته في الإصحاح الأول بكلام عام عن عدل ربنا من غير ما يذكر نينوى أو أشور خالص ... كلام مش مرتبط بزمان معيّن، و الدليل إنه شبه نبوات إشعياء النبي اللي كان بيتنبأ على بابل
- الإصحاح ده بيوصف مدى قوة الله و دينونته للأشرار (بعد إصرارهم على عدم التوبة و استنفاذ كل الفرص اللي ربنا أعطاها لهم) ... و الحقيقة إن الكلام ده بيؤكد عدل ربنا و رحمته مش العكس ... ربنا بيعطي الإنسان كل فرص التوبة برحمة لا نهائية ... لكن فيه مرحلة معينة بيكون الإنسان فيها قلبه قاسي و مستمر في شره و رافض التوبة للأبد ... ساعتها هلاكه بيكون أرحم الحلول ليه و للعالم حواليه
- على الناحية الثانية، يوم الرب بيكون بشارة و رجاء و خلاص لأولاده و خائفي اسمه و الراجين رحمته

'الرب بطيء الغضب وعظيم القدرة، ولكنه لا يبرئ البتة. الرب في الزوبعة، وفي العاصف طريقه، والسحاب غبار رجليه

ناحوم 1 : 3

بطيء الغضب: لطف الله و إمهاله عشان الشرير يتوب ... مش عشان نسي الخطية
لا يبرئ البتة: الإنسان لا يتبرأ إلا بالإيمان و التوبة
السحاب غبار رجليه: في يوم الدينونة

صالح هو الرب. حصن في يوم الضيق، وهو يعرف المتوكلين عليه.

ناحوم 1 : 7

أجمل آية في السفر كله ... أولاد ربنا لما يشوفوا الشر بينتهي، بيمجدوا ربنا اللي أنقذهم في يوم الضيق

'ماذا تفكرون على الرب؟ هو صانع هلاكاً تاماً. لا يقوم الضيق مرتين

ناحوم 1 : 9

دي إشارة للمعجزة اللي عملها ربنا لما حاول سنداريب و جيشه (جيش آشور) احتلال مملكة يهوذا

ساعتها كان سنداريب قائد الجيش و ربشافي نائبه قالوا كلام تعيير في حق ربنا و إنه مايقدرش ينقذ شعبه من يد آشور


و اللي حصل بعد كده إن الملاك قتل 185 ألف من جيش سنداريب ... و بعدين سنداريب مات على يدي ولاده ... و ربنا انتقم من آشور نقمة نهائية

نتعلم إيه؟

ماينفعش أعمل اللي على مزاجي و أقول ربنا طيب و رحمته واسعة و هيسامح ... فيه عقاب و دينونة على كل من يرفض التوبة ... في نفس الوقت لو أنا في ضيقة، أثق إن ربنا في الوقت المناسب هينجيني

يا رب إديني رجاء دائم فيك ... و إديني لا أوجل توبتي أبداً بل أحاسب نفسي باستمرار و بخوف من الدينونة

2: سقوط نينوى



• في الإصحاح الثاني، بيوصف ناحوم النبي منظر جيوش بابل و هي بثسقط نينوى على 5 مراحل:

1. رجال الجيش وهم يستعدون للحرب

2. مركبات الجيش و هي في الطريق لنيوى
3. رجال نينوى يحتمون داخلها من جيش بابل
4. بابل تفكّ الحصار و تحتل نينوى
5. بابل تنهب نينوى تماماً و تقضي عليها

فراغ وخلاء وخراب, وقلب ذائب وارتزاء ركب ووجع في كل حقو. وأوجه جميعهم تجمع حمرة

ناحوم 2 : 10

دي كانت نهاية نينوى المدينة العظيمة ... بعد ما تابت و ربنا رفع غضبه عنهم
للأسف رجعوا أوحش من الأول كثير جداً ... منتهى العنف و الكبرياء
ربنا أعطاهم فرص كثير للتوبة, لكن عند قلبهم رفض التوبة
و بالتالي سقطوا و دينوا ... زي أي شرير متكبر يرفض التوبة

قد ارتفعت المقمعة على وجهك. احرس الحصن. راقب الطريق. شدّد الحقوين. مكّن القوة جداً

ناحوم 2 : 1

المقمعة = الفاس ... مهما بتوع نينوى تقوّوا و حرسوا نفسهم, ربنا لو مدّ إيده هانتقم, هو أقوى من الكل
إذا كان الشياطين بيعملوا كده, كم بالأولى إحنا أولاده:
نحرس الحصن (قلبنا هو هيكل الله)
نراقب الطريق (أفكارنا و سكّتنا)
أحقاؤنا ممنطقة (الزهد و الصوم)
نمكّن القوة الروحية بنعمة ربنا

نتعلّم إيه؟

مهما كان حد فاكّر نفسه قوي و لا يهزم ... ربنا دايماً أقوى ... نينوى كانت مدينة حصينة جداً لكنها سقطت

3: سقوط مملكة آشور كلها



- بعد سقوط عاصمتها و مركز قوّتها، يتنبأ الإصحاح الثالث عن سقوط مملكة آشور الشريرة المملّنة ظلماً اللي بنت نفسها على دماء الآخرين ... لكن كما فعلت يُفعل بك ... و بابل عملت في آشور اللي آشور عملته في الممالك الثانية
- و ينتهي السفر بذكر نهاية ملك آشور (رمز الشيطان) و فرحة الناس اللس استعبدها بهلاكه و نهاية شرّه

ليس جبر لانكسارك. جرحك عديم الشفاء. كل الذين يسمعون خبرك يصفقون بأيديهم عليك، لأنه على من لم يمر شرك على الدوام؟

ناحوم 3 : 19

آخر آية في سفر ناحوم ... منظر رائع جداً تنتهي عليه الدهور
منظر ربنا و هو ينتصر على الشيطان و ينهي شرّه ... و أولاد ربنا فرحانين و مسبّحين ببهجة
الخلاص

هل أنت أفضل من نو آمون الجالسة بين الأنهار، حولها المياه التي هي حصن البحر، ومن البحر سورها؟

ناحوم 3 : 8

نو آمون = مدينة طيبة في مصر

المعنى هنا إن مصر كانت مملكة أعظم و أقوى من مملكة أشور لكنها سقطت رغم إن المياه حماها من أخطار الفرسان (نهر النيل و البحر الأحمر و البحر المتوسط) و صعبت الوصول إليها

نتعلم إيه؟

مهما الشر استمر، فيه يوم ربنا هاينتقم فيه و ينتهي الشر

يا رب إديني هذا الرجاء و الثقة فيك ... في قوتك و حكمتك و عدلك ... كي أفرح معك في اليوم الأخير



المراجع

- موقع [The Bible Project](#)
- وعظة أبونا داود لمعي من برنامج [فتشوا الكتب](#)
- موقع [القديس ت كلاهيمانوت](#)